



Es war im Johr Zwäädusend-Siwwe,
dass ich ach garnid iwwertriwwe,
Do ruft mich die Anette o,
Was machenern donn om Sunndag so?
.....
Warum, frog ich e weng versteert,
im Wald geebds Dose, heddse keert.
Die missdmer suche mimme Plon,
Aha, sag ich ins Delefon.
.....
In sorer Bix, dass weer gonz klasse,
liggt was drin, ich konns nid fasse.
e Logbuch, un noch onner Grembel,
un en wunderbare Stempel.
.....
Im Indernet, do missdmer gugge,
kriegt merr den Plon, dass sinn kä Fugge,
denn kendmer donn, merr misd kurz wade,
uff soin Computer runnerlade.
.....
Donn druckt merrn aus un schun geht's los,
awwer halde mol, meer brauchen blos,
en eigne Stempel noch, wie foi,
denn stemplemer donn ins Logbuch noi.
.....
Gesagt, getan, donn gings ach los,
zu Jochen's Drachenfelsesdos.
Die erschde Tour, die war so schä,
seit dem machmer nix onnres mä.
.....
So hod dess gonze einst begonne,
Heit sinn die Boxe unser Wonne.
Was weer unser Freizeit, wahrschoins nix,
uhne unser Plastikbix.
.....
Noch de erschde Toure hemmers gecheckt,
un uns en Nickname zugelegt.
Er war schnell gfunne, dass is wahr,
Meer sinn „DIE ESCHDLER“, hopp alles klar.
.....
Meer henn donn Boxe gsucht, wie kenner,
doch Boxe leche, is noch schänner.
In Elimestä, die Kuckucksbix,
war schnell gelegt, dass ging gonz fix.
.....

Mittlerweile sinn dess vier,
Vier Kuckucksboxe liggen hier,
Was weer unser Freizeit, wahrschoins ni:
uhne unser Plastikbix.
.....
Ofongs warmer als zu 10, zu 6, zu 4,
denn hod sichs langsam reduziert.
bis vun de Eschdler, ja s'is schlimm,
meer zwää iwwrich gebliwwe sinn.
.....
Die onnre wollden halt, merr musds erkerne
nid in jedere freie Minudd im Wald rumrenne
Drum hemmer en neie Nickname auserkore
de NeuVoPi war donn gebore.
.....
En Vochel, sitzend uffme Pi,
dass is foi, dass gabs noch nie,
dass stemplemer weils uns gefällt,
in alle Logbücher der Welt.
.....
Die Sucherei is fa uns kä Qual,
iwwer 555 an der Zahl,
hemmer bis dato hie gebracht,
dass hod uns schun sehr stolz gemacht.
.....
Die mäanschde Boxe, `s losst uns nid kald
liggen bei uns im Pälzerwald.
Drum Donkschä on den englisch Lord,
der die Letterbox erfunne hod.
.....
Un Donkschä ach dem Pälzer Bu,
der im Pälzerwald im Nu,
die erschd Deitsch Box versteggelt hod,
denn machmer jetzt zum „PÄLZER LORD“
.....
Uns all vereinigt nur äh Sucht,
drum is jede freie Minudd verbucht.
Meer sagens eich jetzt, un zwar gonz fix.
Es läwe unser Plastikbix.



Helau

